

Mientras cu awe su sentencia ta cai na Peru

Abogado di Joran ta segura cu su cliente no ta un psycopata

ORANJESTAD / LIMA – Joran van der Sloot no ta un psicopata manera cu e abogado di famia di Stephanie Flores a pinte di ta. Esaki ta loke abogado Jose Luis Jimenez a declara despues di a tende e declaracionnan haci pa e abogado Eduardo Alvarez.

Tabata durante e proceso diaranson ultimo cu e declaracion aki di parti di Alvarez a bin dilanti, y cu Jimenez mes ora a desbarata. E ta importante den e fase di sentencia di Joran diabierna (awe mainta). Segun Jimenez, loke a pasa cu vd Sloot ta cu e ta un persona des-social y tin un malesa, relaciona cu e persecucion cu e la sufri pa 6 anja debi na e caso Holloway.

Ta obvio segun e abogado, cu e hulandes mester wordo trata pa e malesa aki. Esaki pasobra un persona cu ta tuma bida di un otro persona, clinicamente



Joran van der Sloot

no ta bon di cabes. Mes momento Jimenez a bisa cu e la spera cu Joran lo a haya un sentencia menos di 30 anja manera cu Fiscal a pidi pe diaranson ultimo.

Awe e sentencia lo wordo presenta. A muestra tambe cu pa Joran por haya un tratamiento justo pa por drenta sociedad atrobe, e mester por haya un sentencia reduci. Un sentencia di 30 anja no tin sentido pa e haya rehabilitacion. Como tal, ta pertinente pa e haya un sentencia reduci pa e por wordo trata pa su malesa. Tabata ayera durante e proceso den corte despues cu ora cu Joran a admiti

culpabilidad di e morto di Stephanie Flores, cu su abogado Jimenez a pidi hues pa clemencia, pa asina su cliente haya un reduccion di castigo basa riba declaracionnan specifico relaciona cu e caso anterior di Natalee Holloway. Segun e abogado, ta debi na e caso aki cu a bin ta persigui Joran for di 2005, cu tabatin tanto presion riba dje, bukinan skibi, pelicula traha y mas atencion, cu Joran a cuminsa sufrir di

depresion psicologico cu a afecte seriamente den su actuacion for di momento cu e tabatin 17 aña ora cu e caso ey a tuma lugar. Constantemente Joran mester a defende su mes y wordo persigui segun su abogado.

Tabata diaranson cu Joran van der Sloot a admiti culpabilidad completo di e caso di Stephanie Flores y ta tende diabierna awor (awe) ki sentencia e ta haya finalmente den e caso aki. Un caso cu rapidamente awor ta haya su final despues di un 'tardansa' di casi 1 aña y mei despues cu vd Sloot a comete e acto aki cu e la admiti diaranson.

Dilanti tres hues, contestando e pregunta di e hues principal" Bo ta declara bo mes culpabel of inocente", Joran a bisa, tortomudiando basta debi na su dificultad cu Spaño, cu e ta mantene su confesion original cu e lo a duna cu tur honestidad. Tambe e la declara di tin duele kico e la haci y e ta lamenta e suseso. Un vd Sloot diferente y incomodo ta loke mundo henter por a mira riba television cu un biaha mas a transmiti señal aki rond mundo pa tur interesa. □

Huez na Alabama ayera

A declara Natalee Holloway oficialmente morto

BIRMINGHAM, Ala. –Un huez ayera na Alabama (estado unda cu Natalee Holloway tabata biba) a declara Holloway morto oficialmente. Esaki apenas 24 ora despues cu Joran van der Sloot a declara su mes culpabel di un otro morto, Stephanie Flores na Peru e siman aki.

E hues a dicta a base di petition di e propio tata di Holloway, esta Dave Holloway mientras cu e mama Beth Twitty a protesta e caso aki.

Algun tempo pasa (año pasa) e tata a entrega e petition aki, 6 año despues cu su yiu muher a dis-

parce na Aruba, supuestamente na man di e unico sospechoso den e caso aki di Natalee Holloway. Ora cu e tata a haci tal acto, e mama mesora e protesta (nan ta divorcia) e hecho aki y a muestra cu e no ta di acuerdo cu esaki.

Pero aworaki ta obvio cu e tata a logra su meta y cu aworaki oficialmente su yiu muher ta declara morto.

No ta conoci kico exactamente esaki ta nifica y si den cualkier caso, e morto aki lo por tin effect riba un eventual polisa di seguro cu lo tabatin pa Holloway. Algo cu semper

tabata un asunto cu a keda papia ariba y cu por tabata un di e motibonan di e morto.

No ta conoci ainda kico e acto aki di ayera lo tin riba e caso na Aruba y con Ministerio Publico lo bai trata esaki. Por wel ta cu e no tin ningun efecto riba e caso (ainda den investigacion) of cu awor e caso por wordo sera oficialmente si no tin sentido pa sigui busca ya cu e victima oficialmente ta morto.

Of, cu awor e cargo y sospecho contra Joran vd Sloot ta haya un otro tinte y acusacion oficial. □

